

# LATGALIŠU GAZETA

## “BOŅUKS 2009” izdareits, gatavejamis jau nuokamajam!

14. marta vakorā Rēzeknis kultūrys nomā nūtyka ūtrais Boņuka bolvys padūšonys pasuokums, kuramā pīsadaleja ari kinys “Cylvāka Bārns” golvonuos lūmys tāluotuojs Andris Rudzinskis. Laikroksta “Latgales Laiks” dalykums “Latgališu Gazeta” beja nomināts iz bolvu kai vīns nu lobuokajim masu medejim latgališu volūdā.

### Jurs Viļums

Pasuokumu vadeja jaunais Dailis teātra puorstuovs Kristaps Rasims i iz reizis pastuosteja, ka itamā godā iz 24 nominacejom trejuos kategorejuos Sabīdreiba, Muzyka i Literatura beja sajimti 174 isnāgumi, kas līcynoj par latgališu kultūrys goda bolvys “Boņuks” nūzeimeigumu. Jau ūtrū godu pēc kuortys “Boņuka” bolvu muola statuēti, kas attāloj puiseiti ar suni nu vysim labi zynamuos kinys “Cylvāka Bārns”, veidovuši keramiki Vēsma i Aivars Ušpeli. Pasukumā pīsadaleja taidi jau vysim labi zynomi muoksliniki kai “Patrioti.LG” ar dzīsmes pyrmatskaņuojuumu nu jaunuos lugys latgališu volūdā, kas pyrmizruodi Daugavpiļs teātri sagaideis jau 22. apreli. Koncertu kuplynova literats Valentins Lukaševičs, folklorys kūpa “Ilža”, grupa “Borowa MC”, “Dabasu Durovys” i citi muoksliniki.

Tyka nūskaitēts prozys gabaļeņš nu Bonifacija Pāvulāna pīdzeivojuumim i vysu nominantu pīteikšonai beja sagataveiti eipaši videomateriali. Latgališu kultūrys gazeta – portals LaKuGa.LV – īgīve “Boņuku” kai lobuokais 2009. goda latgališu masu medejis. Goda kultūrys darbinīks Ontons Slišāns, bolvu sajimdams, paļdis saceja sova dzeivūla vuordim: “Te – muna zeme, te – muna tauta, te muns pasaulis, Dīva dūtais!” Jis ir vīns nu ilggadejim latgališu kultūrys kūpijēim i, koč tikai zemniks byudams, rausa raksteit pats i drukavuoit gruomotys latgališu volūdā. Juo kundze Irēna Slišāne sajēme bolvu par lobuokū latgališkū pasuokumu školā etnografiskuo pulceņa darbeibu Upītes pamatškolā (Viļakys nūvods) vysa goda garumā.

Par lobuokū latgališkū pasuokumu kultūrys/tautys nomā atzeits 18. novembra svātuku koncerts “Zynu, zynu tāva sātu” Baļtinovys kultūrys nomā, kas suocūt ar pašvaldeibys vadeituojs uzrunu i turpynoūt ar dzīsmem izskanēja tikai latgališu volūdā. Par itū i citim latgališkim pasuokumim ari 2009. goda pašvaldeibys gūds Baļtinovys nūvodam, bet Rēzeknis nūvods kai ituo goda “Boņuka” padūšonys pasuokuma golvonais atbaļsteituojs jau ir sevi irakstejs pi pretendim iz nuokamuo goda bolvu.

Goda školuojuoja Veronika Dundure nu Nautrānu vydsškols, kas ilgus godus ari reikoj i voda vydsškolanu literatūrys i kulturviesturis olimpiadi i bārnu skotuvys runys konkursu “Vuolyuzāni”, kurs itūgod nūtyks jau dasmytū reizi.

Par lobuokū latgališu sabīdriskū organizaceju ūtru godu pēc kuortys ir atzeits “Latgolys Studentu centrs”, tuo vadeituoja Ilze Sperga ar publikaceju “Latvišus saskaitēit, na atjimt latgališus” sajēme literatūrys “Boņuku” par spylgtuokū publikaceju škarsteiklā/presē.

Lobuokuo publicitatis akceja latgališu kulturā Eriņu i lgaunū saimu daleibai televīzejis šovā “Dziedošās ģimenes”. Nominacejā Audio/video raidiejums/sižets masu medejis par lobuokū nūsaukts Bronislava Spridzāna raidejums “Latgolys Vuords” Latvejis Radejis 4. programā, kas nu jau gondreiz divdesmit godu pēc kuortys it pi cylvāku kotru nedeli.

Latgališu kultūrys sponsors/mecenats: Rēzeknis – Aglyunys dieceze par atbolstu Latgolys Radejis atjaunuošonai i darbeibys turpynošonai.



Bonifacijas Pāvulāns (Andris Rudzinskis)



Goda cylvāks 2009 – Juoņs Eisaks panuoce latgališu volūdai



Eriņu saimes puorstuovi

Lobuokais pasuokums/projekts: 2. Storptautiskuo Latgalistikys konference Rēzeknē – bolvu sajēme konferenceis organizatore, paguojušuo goda “Boņuka” bolvys īgīveja kai “Goda cylvāks” Ilga Šuplinska, kas ari izmontova īspieju i vysu uzaicynova iz 3. latgalistikys konferencei, kas nūtyks ituo goda rudini Vuocējā Greifsvaldē.

Bet par “Goda cylvāku 2009” pasludynuots Juoņs Eisaks, informacejis tehnologiju specialists i entuziasts, pasateicūt kura naatlaideigajam dorbam, latgališu volūda ir īgīvuse starptautiskū ISO kodu “itg”.

Lobuokais izdavums/gruomota 2009. godā – “Sibīrijas latviešu dziesmas”, par spylgtuokū debiju literatūrā bolva Laurai Bicānei nu Vyšku pogosta, tagad Daugavpiļs Universitatis studentei par ik-

mieneša izdavumu “Dūmu pylni pogolmi”.

Muzykys kategorejā nūpīt-nā konkurencē par lobuokū dzīsmi atzeita Laimas Muzykantu aranžēto tautys dzīsmē “As pimiņū, kai maņ muote...” Lobuokuo alternativuo (underground) stila dzīsmē Juoņa Plotača instrumentalais gobols, kū jis nūspēļēja jau paguojušuo goda “Boņuka” pasuokumā i puorsteidze vysus klauseituojuos.

Radejis hits 2009. godā – “Kur gaismeņa”, Oranžais koris, A. Auzāns (bolva teik pasnīgta pēc “LalPA” dūtajim datim par vysvairuok spieleitujom latgališu dzīsmem Latvejis radiostacejuos).

Goda debeja muzykā i reizē ari lobuokais muzykys aļbums Sovvaļnikam. Lobuokais muzykys video grupai “Bez PVN” par dzīsmi “Jeī”.

kulturviesturiskuos skicis “Latgalieši” symts godim. Gruomotys moto: “Pusmiljona tauta ir tikpat dzīves spējīga kā arī miljons”. Pīsasacejumus konferencei (pīsasacejuma anketu ar referata kūpsavylkumu) prosa atsuteit elektroniski. Vairuok informacejis portalā LaKuGa.LV

### Pīters Luocs sajem bolvu par ilggadeju īguļdejumu

Itamā godā organizatori pasnīdze ari eipašu bolvu par lobuokū pasuokumu pyrmsškols vacuma bārnim – “Šķilbanu pogosta pyrmsškols vacuma bārnu egleite”. Pasuokums nūtyka latgališu volūdā, suocūt nu Zimysvātku veceiša ar vysim paleigim i beidzūt ar rūtaļom. Kai atzeimeja vīns nu “Boņuka” bolvys organizatorim, Guntis Rakasims, pi latgališu volūdys juopīradynoj ari ti vacuoki i bārni, kuri nav izavielejuši saimē runuot latgaliski.

Par ilggadeju īguļdejumu latgališu kulturā “Boņuka” statueti sajēme Pīters Luocs, latgališu rokstu muzeja veiduojuos i vadeituojs, slavenuo latgališu gruomotu i preses izdevieja Vladislava Luoča pleminiks.

Itaidi ir bejuši latgališu kultūrys Goda bolvys “Boņuks

2009” laureati, bet bolvys organizatori jau gotovi sajimt pīteikumus iz 2010. goda bolvu – syutit sovus irūsynojuumus, kritiku i prišķlykumus iz epostu: producenti@inbox.lv

Golvanuo ideja i mierkis ir veicynuot latgališu tradicionaluos i popularuos kultūrys atteisteibu Latgolā i uorpus tuos rubežim, apkūpuot lobuokūs goda veikumus, rūsnuot kvalitatīs pīaugumu i originalitāti myusu dinu latgališu kulturā. Iz “Boņuka” bolvu pretendej personys i personu grupys, kas sovā darbeibā i jaunradī litoj latgališu volūdu. Bolvys organizatori latgališu sabīdriskuos organizacejis: “Kukuži”, “Latgolys Zvaigzne”, “Latgolys Studentu centrs”, “Latgališu Etnokultūrys centrs”, “Latgolys Producentu Grupa” i ratuok lītuotūs volūdu organizaceja “LatBLUL”.

### NŪTIKŠONU KALENDERS

● 19.03.2010 22:00  
Jezupa dīnys bals. Spīlejoj kapelela “Maskačkys spīlejmāni” Rožonovys (Rūžupis) Kultūrys nomā. Tīšona Ls 2 (t. 29141314)

● 22.04.2010  
“Kleperniku pogosta zvaigzne” Daugavpiļs teātra izruodis latgališu volūdā pyrmizruode.

● 24.04.2010  
Skatuvīs runys konkurss “Vuolyudzāni” i vydsškolanu olimpiade  
Rēzeknē nūtyks jau dasmytāys skotuvīs runys konkurss “Vuolyudzāni” i latgališu volūdys i kulturviesturis olimpiade vydsškolanim. Pīsasaceišona da 21. apreļa. Konkursu nūtykumi portalā LaKuGa.LV

● da 2010. goda 1. maja pīsasaceišona iz 3. storptautiskū latgalistikys konferencei  
Konference “Volūdu ekoloģeja baļtejis jūrys regionā: regionaluos volūdys globalizacejis laikūs” nūtyks ituo gods rudini Ernsta-Morica-Arnda Greifsvaldis universitatē (Vuocējā). Veļteita Franča Kempa

“Latgališu Gazetu” atbolsta Latgolys regiona atteisteibys agentura i Kulturkapitāla fonds.

